

Mud Volapüka

Nüm 67

28 yulul 2017

Bukemaboed

Fövot lekoned-mära yutopik
„Ventürs hiela ‚Nenolikan‘ e flenas omik“
fa hiel „N. N. Nosov“

Kapit degvelid. Täv elas: ‚Skrubül‘ e ‚Lebuonül‘ < lü zif ‚Kaitöp‘.

„Balposvotiko segololsös,
Ad koapaskilükam kedädikolsös.
Deli de koapaskilükam primolös,
Trögi me muf modunolös.“

Skrubül e Lebuonül äkanitoms kaniti at dö koapaskilükam, keli poedan:
‚Florül‘ < ipenotom.

Göd äbinon, e nog äslipoy s pö Grünazif, ab Skrubül e Lebuonül ya äbestepoms sütis, kanitölo e turölo pö golam. Sevölo nog [ya] sis ädel, das gödo ösötöy libükön omis de malädanöp, dat unätükoms toodi, igalikoms tu gödiko ed eprimoms ad flagön [de oy] ad libükön omis sunädo. Pulmonar, kel äbedredof jovi bü val, ebüedof degevön spidiküno klotemi etanes.

Elelilölo tonis kanita nog fagao, jicilils mödik egalikofs ed eprimofs ad seologedön de fenäts; anikans igo esegolofs plödio ad süt.

„He!, o jicilils, garad orsik kitopo topon?“ - Skrubül ävokädom.

„Tevobsös, ulüjonob ores“ - jicilil lenlabü bonät redik e mäned blövik ko kolet daunik



Platotajonian ä! zif: ‚Змеевка‘ [,Kaitöp‘]

de jönul dofabraunik ebailof oki.

„Täno, jonolöd obes: detio-li u nedetio-li?“ - Skrubül esagom.

„Detio“ - jicilil egesagof, lelogölo ko nuläl yäkis küirik omsik.

„De-ti-ö! Majö!“ - Skrubül elebüdom ed, edetioflekölo oki, äbestepom süti. - „[Lög] Balid-telid ! Balid-telid!“

Lebuonül ädunom stepami leigik po etan. Jicilil, töbo reivölo, ärönof bunülölo pödo.

Evifikumölo, Skrubül e Lebuonül ebeiṛönoms leyani flagabik.

„Stopö!, stoporsöd!“ - jicilil ävokädof. - „Ebeiṛgolors.“

„Züoṛflekiö!“ - Skrubül elebüdom.

Etans bofik egüflekoms ed egeflekoms okis lü leyan. Jicilil emaifükof kläpedili. Valikans kil enügolons ini yad, pö kel barak petegöl me tein ästadon nilü dom.

„Garad kion! Atos binon te baraku, ab no garadu.“ - Lebuonül emurom, maifükölo yani sleifik veitotik.

Skrubül enülogedom ini barak ed eküpom toodi.

Jicilils nog anik elükömofs lü garad.

„Is dagos“ - Skrubül esagom. - „Ekö, seṛsleifobsös toodi plödio.“

„Ab ut ga no kanon mufön, binon dädiku üfo“ - jicilils äsagofs.

„Lindifos, useṛdränobs oni me brads. Ekö, bruätorsös oni pödo. Ekö, kobädö! Nogna!“

Tood äkniron ed esleafon se garad.

Skrubül e Lebuonül sunädo enüdranoms disi tood. Jicilils ästanofs züo ed älogedofs bluvölo disi tood.

„Ö!“ - semikna pälilos disaü tood - „cub ivorikon! Ö, skrub defon! Ö! Rüd pro blünam sirupa ispranon!“

Fino esedranoms disaü tood.

„Ekö, blinorsöd isio leskrübömi, beitzäpi, fögi e soldaferi [soldarüdi]“ - Skrubül esagom jicililes.

„Ab labobs nosi bevü ats.“

„Kio, no labors? Kisi labors üfo?“

„Labobs saovi. E cüdi.“

„Ha! No nätükoy toodi me cüd. Hicilils komoms-li seimöpo zi is?“

„Hicilils komoms te tö Kaitöp.“

„Liofagotiko topon?“

„Fagotü düp bal gola [tö fagot holas bal gola].“

„Atos leigon mö hol bal kol ors, ab ureafobs pos tim brefikum. Konorsös: lio nedos golön.“

„Ekö, detio ve süt, ab pos atos nedos golön ai stediko. Poso veg da fel okomon, if golön ve veg at stediko, täno ureafoy ebo ad Kaitöp.“

„Esuemob“ - Skrubül egesagom. - „Ekö, majö!.. Stopedö!“ - elebüdom süpiko. - „Ors, o jicilils, uramenorsös rägilis seimik e, du otevom, ukluinorsös toodi staböfiko. Tood löfon käli.“

„Rajanö“ - jicilils esiofs.

„Ekö, täno majö!“

Etans bofik ästepoms äl süt. Edetioflekölo, Skrubül elebüdom:

„Kaniti!“

E flens obsik äkanitoms lelaodiko:

„Ägolob da fot, ägolob da bälät

Kobü flen gudik obik.

Äbegrämobs taila~~lu~~bel~~is~~,

Ästunidobs flor~~ül~~is.

Süpo ekolkömobs frogi

E vifiküno ärönobs lomio.

Ireafobs lomi

Ed esagobs: ‚ag!‘.

Ven kanit at efinikon, eprimoms ad kanitön votiki, poso dönu e dönu.

Suno esegoloms se zif ed äbestepoms vegi. Igo düp bal no epasetikon, kü zif: ‚Kaitöp‘ < epubon fagao. Ebo ottimo Skrubül e Lebuonül eküpoms toodi stadöl zänodü veg. Enilik~~um~~ölo lü tood, eküpoms lövikani disü tood.

Kap e blöt omik löliko pätegons fa vab, te lögs labü blit blägik smivovik [pi=miotöl] äsestegons plödio.



„He, o kompenan, solol-li oki?“ - Lebuonül evokom omi.

Lövikan esesteg=ük=om kapi daga=herik frida=herik okik disaü tood:

„Ekö, vio logol, neodob ad solön oki dis tood.“

„Ab kis ijenon?“

„Ga [tood] at no vaibon, deätik kion! U va sirupi=blün defon-la, u va mödet [dilädian] karbata=züda=vata pa=ropon. Leno kanob tuvön kodi.“

Lövikan esedranom plödio ed enokom len luib me lög demü pülsif.

Älenlabom yäki blägik, kel pi=miotöl me smiv leigoäs blit sovemo, das äjinos, äsva pi=binädöl me küir. Äjinos, das stiran glifik at neodom noe vabön pö tood okik abgüä seatön dis on, sukölo döfis valasotik, kelos ya suvo jenon kol dalabans mödik toodas karbatazüdavatik.

Skrubül ezügolom zü tood, edalogom cini e, no etuvölo kodi, enüdranom disi tood. Evobölo dis on, ese=dranom ge ed ästanom, kratölo kapapödoti dubä äletikom. Lebuonül enüdranom disi tood po Skrubül, pas täno dalaban tooda enüdranom. So nü änüdranoms balposvotiko, tän ästanoms, bluviko lülogedölo lü tood e kratölo kapapödoti.

Fino Skrubül eplöpom ad tuvön kodi leläsikama motora. Tood eprimon ad jäfidön. Stiran äfredom e danöfo änamiflapom namis Skrubüla e Lebuonüla:

„Danö, o kompenans! Ösoloböv oki nen ols jüi soar. Kiöpio tevels? Seidolsös oki [ini tood], uko=blünob [olis].“

Skrubül e Lebuonül ekonoms etane zeili tävi oksik.

„Labob leskrubömi, beitzäpi e fögi, klu kanob givön oles. Te no labob soldarüdi“ - stiran esagom.

„Ab mögos-li ramenön soldaferi de ek pö zif olsik?“

„Kikodo no mögos? Fe mögos. Kaenal obsik: hiel ‚Boada=skrub=ül‘ < labom soldarüdi. Tevobsös lü om.“

Valikans kil eseidoms oki ini tood e ya pos minuts anik ereafoms süti löpik [zänik] Kaitöpa.

Reidolsös fövoti konota pö nüm fovik.